

# DÁBÁLAŠ MEARRÁDUSAT HÁVDÁDEAPMÁI

Dábálaš mearrádušat hávdádeapmái leat mearriduvvon 2002 Girkočoahkkimis. Mearrádusa vuodđon lea ruvnaprinsareg. res. golggotmánu 26. beavvi 1990, gč. vuodđolága § 16.

Mearrádušat doaibmagohtet njukčamánu 1. beavvi rájes 2003 sorjjakeahttá makkár hávdádanortnet adnojuvvo. Dan rajes doaibmagohtet dát mearrádušat daid sajis mat leat Dábálaš mearrádušain *Norgga girku Ipmilbálvalusgirjji* Oassi II, siiddut 129 – 131.

Čuovvovaš Hávdádan ortnet mearriduvvui 2002 Girkočoahkkimis ollistit *Norgga girku Ipmilbálvalusgirjji* ortnega. Mearrádusa vuodđun lea ruvnaprinsareg. res. golggotmánu 26. b. 1990, gč.. vuodđolága § 16.

Njukčamánu 1. beavvi 2003 rájes váldojuvvo ortnet atnui searvegottiin gos searvegotečoahkkimat dan leat mearridan.

# Hávdádeapmi

## DÁBÁLAŠ MEARRÁDUSAT

1. Hávdádeapmi lea searvegotti mañemus bálvalus miellahttuiddas. Go olmmoš jápmá, de lagamuččat, dábálaččat bearaš, fuolahit ahte jápmán olmmoš oažžu gudnálaš divššu ja hávdádeami. Hávdádeapmái leat vuoddonjuolggadusat hávdádanlágas.

Hávdádanlága § 9 lea mearridan geas lea riekti, ja maiddái lágalaččat ovddasvástádus, fuolahit hávdádeami.

Go olmmoš gii gullá Norgga girku jápmá, de berre jođánepmosit ásahuvvot oktavuoha gaskal searvegotti báhpá ja lagamuččaid. Hávdádeapmi galgá dahkkot mañemus 8 beavvi mañnil jápmima, gč. hávdádanlága § 10 goalmát laddasa ja § 12.

2. Girkolaš ortnega mielde lea hávdádeapmi doaibma mas lea ipmilbálvalus vuohki. Ortnega hápmi ovdanbukta girku risttalaš oskku guovddáža: ahte olmmoš lea Ipmila sivdnáduš, ahte Ipmil lea Jesus Kristusa jápmima ja bajásčuožžileami ja sutnje oskuma bokte ásahan bestojumi olbmui, ahte duopmobeavvi galgá dat ieš dahkat logu eallimis ovddas, ja ahte dat galgá bajásčuoččáldahttojuvvot.
3. Buohkat geain lea ovddasvástádus ja geat leat veahkkin hávdádeamis galget čálabáikkiid, rohkosiid ja sálmmaid válljemis ja das mii muđuid daddjojuvvo ja dahkkojuvvo, fuolahit ahte biibbalaš sáhka ovdanbuktojuvvo dievaslaččat. Daguid, nugo čiŋaheami, symbolaid atnima ja hávdeliidiid bidjama galgá heivehit girkolašmeanuid vuohká. Das berre mearri man ollu hávdeliedit ja dakkárat galget leat.  
Hávdeliidiid bidjama oktavuodas ii biddjo áigi sártniide, jus nu ii leat šihttojuvvon singuin geat fuolahit hávdádeami.  
Lagamuččat berrejit beassat fárus láchimis.
4. Sálmmat ja lávelagat galget ovddalgihtii dohkkehuvvot sus gii galgá doaimmahit. Seammaládjje guoská maiddái gudnejahttojumiide ja eará daguide maid hálidit čadahit lassin hávdádanortnegii. Kantora/čuojaheaddji galgá ovddalgihtii dohkkehan buot musihka mii galgá čuojahuvvot. Go galgá válljet vuohkkaseamos sálmmaid ja musihka ja eará doaimmaid, de berre lagamuččaiguin ásahit oktavuoda nu jođánit go vejolaš.
5. Lea dárbbalaš bidjat buori áiggi vai sihkarastá gudnálaš čadaheami doaimmas. Son gii doaimmaha galgá maid bearráigeahččat ahte buohkat geat oasálastet hávdádan-doaimmas, ferejit nu ahte doaimma sáhtá čadahit buori ja gudnálaš vugiin, girku ortnegiid mielde.
6. Liturga doaimmaha barggus dilálašvuoda ja báikki vieruid mielde jogo

girkus/kapeallas ja hávddi luhtte, dahje ruovttus ja hávddi luhtte, dahje dušše hávddi luhtte. Hávdádandoaibma čađahuvvo girkus maiddái dalle go lea kremašuvdna.

Gunaid biđgema birra dadjá hávdádanláhka ná: Ii sáhte gáibidit girkolaš oasálastima dakkár hávdádeapmái (hávdádanláhka § 20 maŋemus čuokkis ja § 9 maŋemus lađas).

Go liturga doaimmaha dušše ruovttus ja hávddi guoras dahje dušše hávddi guoras, de adno ortnet *Hávdádeapmi girkus dahje krematorias* nu guhkás go lea lunddolaš. Seammaládje dahkko dalle go hávdádeamis eai leat mieđušteaddjit.

Girkolaš oasálastin ii sáhte ráddjejuvvot dušše muoldasuhppemii.

Ortnet *Hávdádeapmi girkus dahje krematorias* sáhtá dárbbaslaš lasáhusaiguin adnot muitorohkosbottus girkus dahje kapeallas go gistu ii leat girkus doaimma čađaheamis.

7. Njuoratmánáid hávdádeamis doibmet seamma mearrádušat go mánáid

hávdádeamis, gč. s. **legg inn sidetall**. Seammaládje dalle go váhnemat hálidit hávdádit máná

gii lea jápmán ovdal riegádeami. Dakkár oktavuodain lea vejolaš rievdadit ortnega lađđasiid nu movt dillái buoremusat heive, muhto Hearrá rohkos galgá álohii válđojuvvot mielde.

Sáhtá leat mávssolaš veahkehit váhnemiid addit nama jápmán njuoratmánái, dahje mánái gii lea ovdal riegádeami jápmán.

Go váhnemat geat hálidit iežaset máná gásttašahhtit, masset mánáset ovdal gásttašeami, de muittuha báhppa sidjiide dan jedđehus sáni ahte “Almmálaš Áhčči ii dáhto ahte oktage dáin uhcahaččain láhppo”. (Matt 18,14) dahje eará čálabihtá.

8. Muoldasuhppen dahkko hávddi luhtte. Liturga sáhtá das spiehkastit jus olggaldas dahje vuđolaš persovnnalaš ákkat dan gáibidit, ja mearridit dan čađahit girkus / kapeallas.

Kremašuvnna oktavuodas čađahuvvo muoldasuhppen doaimma loahpaheamis.

Váldonjuolggadus lea ahte gistu luitojuvvo ovdal muoldasuhppema.

Searvegodderáđđi sáhtá mearridit muoldasuhppema čađahit ovdal go gistu luitojuvvo.

Gistu galgá luitojuvvot áibbas bodnái.

Jus eahpiduvvo ahte lea go muoldasuhppen čađahuvvon, ovdamearkka dihtii go kremašuvdna lea olgoriikkas dahkkon, de sáhtá muoldasuhppema čađahit urdnabidjama oktavuodas.

9. Hávdádeami sáhtá diakona doaimmahit jus nu lea suohkanbáhpain ja bismmain šiehtaduvvon.

Jus ii leat báhpas iige diakonas vejolašvuohta doiammahit hávdádeami, de sáhtá dábálaš risttalaš olmmoš dan doaimmahit bismma dohkkeheami vuodul.

10. Stuorámuš bielluin sáhtá goalkkuhit sullii 5 minuvtta ovdal oktiičuojahemiin, mii dahkko seamma bielluin.

Sáhtá goalkkuvvot go mieđušteaddjit mannet hávddi lusa ja go gistu luitojuvvo, ja doaimma loahpahettiin sáhtá čuojahit 3 gearde 3.

Biellut sáhttet čuodjat go mieđušteaddjit vulget hávddi luhtte.

11. Liturgalaš ivdni lea sáhppes ruoksat.

12. Liturga oasálastá muitobottus. **PS! Sjekk dette!**

# Hávdádeapmi

## girkus dahje krematorias

### 1 Girkobielločuojaheapmi

Go lea čuojahuvvon girkobielluiguin, de liturga čohkkeda korrii.

### 2 Preludia

Heivvolaš čuojanasmusihkka, koarralávlun dahje aktolávlun sáhtta doaibmat preludian. Preludia sáhtta álgun vuosttaš sálbmii.

### 3 Sálbma

Dán sálmma lea vejolaš sirdit maŋábeallái 4. lađđasa.

### 4 Álggahansánit

L<sup>1</sup> Árbmu lehkos dinguin ja ráfi Ipmil Áhčisteamet ja Hearrámet Jesus Kristusis.

Mii leat čoagganan dása (namma namuhuvvo) earrodearvvuođaid dahkat. Mii hálidit addit su Ipmila háldui [ja čuovvut su maŋemus vuoiŋŋastanbáikái]. \*

\* Ruođuid siste teaksta ii dárbbas váldojuvvot mielde dalle go lea kremašuvdna.

Dasgo nu lea Ipmil ráhkistan máilmmi ahte son attii áidnoriegádan Bártnis, amas oktage guhte osku sutnje mannat gáđohussii, muhto vai son oažžu agálaš eallima.  
Joh 3,16

Dasto sáhtta liturgii ja joatkit čuovvovaš čálabáikkiiguin:

**Jogo A**

Jesus cealká: Bohtet mu lusa, buohkat geat rahčabehtet ja guoddibehtet lossa nođiid,  
de attán didjiide vuoiŋŋadusa. Matt 11,28

---

<sup>1</sup> L = liturga

Dahje **B**

Ipmil cealká sánistis:

Čuorvvo mu heahtebeaivvi, de mun gájun du, ja don máinnut mu.

Sál 50,15

## 5 Álggahanrohkos

L Rohkadallot.

Jogo **A**

Čiekŋalassas mun čuorvvun dutnje, Hearrá.

Hearrá, gula mu jiena!

Jorgal bealját mu guvlui

ja guldal mu njuoras rohkosiid.

Jos don vurket suddid, Hearrá, gii dalle ceavzá?

Muhto dus lea ándagassii addojupmi,

dan dihtii mii ballat dus.

Mun vuorddán Hearrá,

mu siellu vuordá,

mun vuorddán su sáni.

Mu siellu vuordá Hearrá eambo

go goziheaddjit iđida, goziheaddjit iđida.

Israel, vuordde Hearrá,

dasgo Hearrá lea árbmugas,

sus lea fápmu lonistit.

Son lonista Israela buot sudduin.

Sál 130, 1-8

Dahje **B**

Hearrá, don leat leamaš min orrunsadji sogas sohki.

Ovdal go várit riegádedje,

ovdal go eanan ja máilbmi šadde,

agálašvuodas agálašvuhtii leat don, Ipmil.

Don divttát olbmo šaddat fas muoldan

ja cealkkát: “Máhccet ruoktot, olbmománát.”

Dasgo duhát jagi du čalmmiin lea dego

ievttáš beaivi mii jávkkihii meattá,

dego idjagohcinvuorru.

Oahpat min lohkat beivviideamet,

vai mii oažžut viissisvuoda váibmui!

Sál 90, 1-4.12

## Dahje C

Ipmilan, Ipmilan, manne leat mu guođđán?  
Mun váidalan headistan, muhto bestojupmi  
lea guhkin eret.  
Ipmilan, mun čuorvvun beaivet, itge don vástit,  
ja ihkku, inge oaččo ráfi.  
Muhto Hearrá, ale leage guhkin mus eret,  
doama veahkehit mu, don mu gievrvuohta!

Sál 22, 2-3.20

## Dahje D

Bassi Ipmil, almmálaš Áhčči, don ráđđet buot eallima ja jápmima badjel. Go mii dál dahkat earrodearvvuođaid ráhkkásiinnámet, de nanne min oskku, vai mii hávddi luhtte ge sáhttit bidjat doaivvumet dutnje.

Hearrá Jesus, oskkáldas Beasti, guhte manai jápmima ja hávddi čađa min dihtii, oro min luhtte min mañimuš headis. Don guhte leat bajásčuožžileapmi ja eallin, bovtte min agálaš eallimii. Don guhte leat searvegotti Beasti ja Hearrá, suova min oktii čoagganit du Áhčát vissui duinna ja buot du olbmuiguin.

Bassi Vuoigŋa, alimus jedđejeaddji go mii eallit ja jápmit, deavdde buot morašteaddji váimmuid ipmilvuoda jeddehusainat. Beaste min vuoigŋalaš jápmimis, gease buohkaid du lusa, ja atte midjiide almmálaš dávvira.

## Dahje E

Hearrá Ipmileamet, du luhtte lea eallima ája,  
du čuovgasis oaidnit čuovgasa.  
Du siste mii eallit, lihkadit ja leat.  
Várjal min ráhkisvuodainat eallimis ja jápmimis,  
Bártnát Jesus Kristusa, Hearrámet bokte.

## Dahje F

Buorre Ipmil, don gii oainnát ja dovddat min, boađe min lahka jeddehusainat.

## 6 Muitosánit

Báhppa dahje muhtin lagamuččain doallá oanehis muitosártni. Das berre namuhit muhtin beliid dan olbmo eallimis, ja deattuhit erenoamážit dan olbmo eallima mearkkašumi su lagamuččaide, ja earáide geaiguin son su eallimis lea servvoštallan iešgudet oktavuodain.

Dás sáhttet buktit dearvvuođaid, bidjat hávdeliidiid ja dahkat eará muitodaguid jus leat dakkárat, nugo jitnositlohkan, musihkka, gintaliid cahkkeheapmi jna.

Dás sáhtta čuovvut:

## 7 Sálbma dahje musihkka

Musihkkaosis sáhtta jjojo lávlut dahje čuojahit čuojanasa.

## 8 Čálalohkan

**L** Gullot maid Ipmila sátni duođašta dán eallima nohkavašvuoda birra,  
jápmima ja duomu birra, ja min doaivaga Jesus Kristusis.

Dákko leat golbma teakstalohkama. Teavsttat válljejuvvojit nu ahte gokčēt dan sisdoalu mii ovdalis lea namuhuvvon.

Searvegoddi čohkká dan botta go lohkkovuvvo.

Teavsttaid lohka liturga dahje okta dahje moadde eará.

Čálalohkan loahpahuvvo dáinna:

**L** Nu čuodjá Hearrá sátni.

Dákko sáhtta čuovvut

## 9 Sálbma

Jus 7. lađas lea sálbma, de ii dárbbas 9. lađasa váldit mielde.

## 10 Sárdni

Oanehis sárdni lohkkovuvvon čalabáikkiid vuodul dahje eará heivvolaš teavstta vuodul.

## 11 Rohkos

**L** Rohkadallot.

Jogo **A**

**L** Agálaš Áhčči, min dorvu morrašis, leage lahka ráfiinnat. Nanne min oskkus. Atte midjiide boahteáiggi ja doaivaga. Mii giitit du (namma namuhuvvo) ovddas ja dan maid don su eallima bokte addet midjiide.

Váibmoládis Ipmil, mii addit su du háldui. Don gii leat min sivdnidan govat mielde ja addán Jesus Kristusa midjiide Beastin, čuoččaldahte min bajásčuožžileami

beivvi agálaš eallimii du luhtte.

#### Dahje B

**L** Jesus Kristus, don gii lohpidit leat minguin buot beivviid gitta máilmmi loahpa rádjái, leage min gievrvuohta ja jedđehus, min čuovga ja oahpisteaddji. Suovašit min buohkaid dutnje oskkudettiin oktii oažžut oasi bajásčuožžileami ilus.

#### Dahje C

**L** Agálaš Ipmil, almmálaš Áhčči, don leat Bártnistat, Jesus Kristusis, addán midjiide vuoittu jápmima badjel. Mii rohkadallat: Láide min Bassi Vuoiŋgainat, amamet jorgalit dus eret, muhto ealidettiin oskkošimmet du Bárdnái, ja oktii olahit agálaš eallima du riikkas, Jesus Kristusa, Hearrámet bokte.

#### Dahje D

**L** Hearrá Jesus Kristus, don gii buot min sudduid guddet, mii giitit du ráhkisvuođa ovddas mii lea gievrrat go jápmín. Atte midjiide oasi bestojumis maid jápmimat ja bajásčuožžileamát bokte vuitet, ja láide min fámoláš gieđainat eallima, jápmima ja duomu čađa iežat agálaš illui.

#### Dahje E

**L** Almmálaš Áhčči, mii giitit du dan ovddas maid don addet (namma namuhuvvo) bokte gii dál lea jápmán. Nanne ja jedđe buohkaid geat moraštit ja dovdet ohcaleami. Mii bidjat iežamet du gievrras giitii. Veahket searvevuođastat min eallit, vai mii oktii beassat vuolgit dáppe ráfis, Jesus Kristusa, Bártnát, Hearrámet bokte.

#### Dahje F

Rohkos mii lea čállojuvvon dan dilálašvuhtii maid lagamuččat ja báikkálaš servodat leat dán jápmima oktavuodas muosáhan.

Dákko sáhtta čuovvut

## 12 Du gieđaide

**Buo**<sup>2</sup> Du gieđaide mun bijan vuoigŋan, Hearrá,  
oskkáldas Ipmil, don lonistat mu.  
Du gieđaide mun bijan vuoigŋan, Hearrá.  
Gudni lehkos Áhččái ja Bárdnái ja Bassi Vuigŋii.  
Du gieđaide mun bijan vuoigŋan, Hearrá.

---

<sup>2</sup> Buo = buohkat



Dán lađđasa sáhtta maiddái lávlut vurrolagaid, geahča NoS 936

Dákko sáhtta maiddái Simeona máidnunlávлага (Luk 2, 29-32) jogo lohkat dahje lávlut, geahča Norsk Salmebok 909-910.

## 13 Hearrá rohkos

L Rohkadallot Hearrá rohkosa.

**Buo** Áhččámet, don guhte leat almmis!

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Atte midjiide min suttuid ándagassii,

nugo mii ge ándagassii addit velggolaččaidasamet.

Ale ge doalvvo min geahččalussii,

muhto beastte min bahás.

Dasgo du lea riika ja fápmu ja gudni agálašvuhtii.

Amen.

Dahje

**Buo** Áhčči min, don guhte leat almmis!

Basuhuvvos du namma.

Bohtos du riika.

Šaddos du dáhttu

mo almmis nu maiddái eatnama alde.

Atte midjiide odne min beaivválaš láibámet.

Ja atte midjiide min suttuideamet ándagassii,

nugo maiddái mii ándagassii addit min velggolaččaidasamet.

Ale doalvvo min geahččalusa sisa,

muhto beastte min bahás eret.

Dasgo du lea riika ja fápmu ja gudni agálašvuhtii.

Amen.

## 14 Sálbma

## 15 Postludia

Ovdal postludia sáhtta jogo lávlut dahje čuojahit čuojanasa.

Go postludia lávlojuvvo dahje čuojahuvvo, de guddojuvvo gistu olggos.

## MUOLDASUHPPEN

### A Hávddi luhtte

Ovdal 16. lađđasa **Sálbma** biddjojuvvo gistu hávddi ala ja bissu das gitta 19. lađđasii **Luitojupmi**.

Gos geavatláččat lea nu, luitojuvvo gistu hávddi bodnái ovdalaš go sálbma (16. lađas) lávlojuvvo.

### 16 Sálbma

Dasto sáhhtá ná jotkojuvvot

### 17 Čálalohkan

Okta čuovvovaš teavsttain, mat eai leat dán hávdádeamis ovdal lohkkojuvvon:

Sálbma 50,15	Sálbma 23
Sálbma 68,21	Sálbma 121
Matt 11,28	Matt 28, 1-10
Alm 2, 17b-18	Alm 21, 1-5a

Dákko sáhhtá čuovvut

### 18 Rohkos hávddi luhtte

Dán rohkosis sáhhtá liturga heivehit (namma namuhuvvo) nu mo lea vuohkkaseamos – ovdamearkka dihtii olles namain, ovdanamain, min ráhkis, min ustit jnv.

#### **Jogo A**

Herrá Jesus Kristus, divtte dán hávddi leat doaivvu báikin, oskkudettiin dutnje gii čuožžilit bajás jábmiid luhtte.

#### **Dahje B**

Herrá Jesus Kristus, don gii ieš hávdáduvvojit, divttášit čuovvut du jábmiid luhtte bajásčuožžileamis.

#### **Dahje C**

Herrá Jesus Kristus, divtte (namma namuhuvvo) vuoijastit ráfis ruossa mearkka vuolde gitta bajásčuožžileami iđidii. Veahket min eallimis ja jápmimis bidjat doaivvumet dutnje.

## Dahje D

Herrá Jesus Kristus, don gii ieš hávdáduvvojit, divtte dán báikki leat doaivaga báikin, gos (namma namuhuvvo) beassá ruossa mearkka vuolde vuoiŋastit gitta dan beaivvi rádjái go don rávkkat buohkaid bajás hávddiin. Veahket min eallimis ja jápmimis bidjat doaivvumet dutnje.

## 19 Luitojupmi

Gistu luitojuvvo dábálaččat áibbas bodnái.

## 20 Muoldasuhppen

L Áhči, Bártni ja Bassi Vuoiŋa nammii.

Liturga suhpe dasto muoldda golmma geardde gisttu ala ja cealká:

1. geardde: Eatnamis leat don boahtán.
2. geardde: Eanamin don šattat.
3. geardde: Eatnamis don bajásčuožžilat fas.

## 21 Čálasátni ja buressivdnáduš

### Jogo A

L Min Herrá Jesus Kristus cealká: Mun lean bajásčuožžileapmi ja eallin.

Dat guhte osku munnje, oažžu eallit vaikko vel jápmá ge.

Ii oktage guhte eallá ja osku munnje, jáme agálašvuodas ge. Joh 11, 25-26

### Dahje B

L Máidnojuvvon lehkos Ipmil, Herrámet Jesus Kristusa Áhčči, guhte stuora árkkálmastinvuodastis lea riegádahtán min ođđasis ja addán midjiide ealli doaivvu go bajásčuoččáldahtii Jesus Kristusa jábmiid luhtte. 1 Biet. 1,3

L Vuostáváldet buressivdnádusa.

Herrá buressivdnidivččii du ja várjalivččii du.

Herrá divttášii muođuidis čuovgat du badjelii ja livččii dutnje árbmugas.

Herrá bajjdivččii čalmmiidis du ala ja attášii dutnje ráfi. +

## 22 Sálbma

## B Krematorias

Hávdádandoaibma bajábealde (lađđasat 1-13) loahpahuvo muoldasuhppiin (lađđasat 19-23).

Nubbin vejolašvuhtan sáhtá dán ortnega maidái čuovvut girkus / kapeallas, geahča Dábálaš mearrádušat, 8. čuoggá, siidu **legg inn sidetall**.

## 19 Luitojupmi

### 20 Muoldasuhppen

**L** Áhči, Bártni ja Bassi Vuoiŋŋa nammii.

Dasto suhpe liturga golmma geardde muoldda gisttu ala ja cealká:

1. gearde: Eatnamis leat don boahtán.
2. gearde: Eanamin don šattat.
3. gearde: Eatnamis don bajásčuožžilat fas.

### 21 Čálasátni ja buressivdnáduš

**Jogo A**

**L** Min Hearrá Jesus Kristus cealká: Mun lean bajásčuožžileapmi ja eallin.

Dat guhte osku munnje, oazžu eallit vaikko vel jápmá ge.

Ii oktage guhte eallá ja osku munnje, jáme agálašvuodas ge.

Joh 11, 25-26

**Dahje B**

**L** Máidnojuvvon lehkos Ipmil, Hearrámet Jesus Kristusa Áhčči, guhte stuora árkálmastinvuodastis lea riegadahtán min ođđasis ja addán midjiide ealli doaivvu go bajásčuoččáldahtii Jesus Kristusa jábmiid luhte! Biet. 1,3

Morašteaddji jovkui čalmmiid:

Vuostávdet buressivdnádusa.

Hearrá buressivdnidivččii du ja várjalivččii du.

Hearrá divttášii muođuidis čuovgat du badjelii ja livččii dutnje árbmugas.

Hearrá bajjdivččii čalmmiidis du ala ja attášii dutnje ráfi. +

## 22 Sálbma

## 23 Postludia

Lanjain gos luitojupmi ii leat vejolaš, berre gisttu doalvut eret postludia botta.

# ČÁLALOHKOSAT

## Teakstačoakkáldat I

### Jogo A

Muhto mun, mun dieđána ahte mu lonisteadđi eallá, ja nugo dat maŋemus galgá son loaiddastit ovdan muoldda ala.

Ja maŋŋil go mu liikki lea duššaduvvon, galggan mun mu oaččistan olggos geahččat Ipmila, gean mun, mun galggan geahččat alccesan buorin, gean mu čalmmit galget oaidnit, ja ii oktage amas;

[mu monemaččat golahuvvojit mu siskkilušas!]

Job 19, 25-27a [27b]

### Dahje B

Hearrá lea mu báimman,  
ii mus váillo mihkkege.  
Ruonas gittiide son livvuda mu,  
vuoŋŋadusa čázi lusa son láide mu.  
Son áhpásmahtá mu sielu.  
Son doalvu mu vánhursvánhurskkisvuođa  
bálgáid mielde namas dihtii.  
Vaikko mun vádjolivččen jápminsuoivvana leagis,  
de in balaše mange bahás.  
Dasgo don leat mu mielde.  
Du soabbi ja báimmansoabbi jeđđejit mu.  
Don ráhkadat munnje beavddi mu  
vašálaččaid čalmmiid ovddas.  
Don vuoiddat mu oaivvi oljjuin,  
mu juhkanlihti golgá badjel.  
Aivvefal buorrevuohta ja árbmugasvuohta galgá  
doarridit mu buot mu eallinbeivviid,  
ja mun beasan ássat Hearrá viesus  
guhkes áiggiid čađa.

Sál 23

### Dahje C

Nugo sarvvis goikaluvvá golgi jogaid maŋŋái,  
nu goikaluvvá mu siellu du maŋŋái, Ipmilan.  
Mu siellu goiká Ipmila maŋŋái, ealli Ipmila maŋŋái.  
Goas beasan loaiddastit su muođuid ovdii?  
Mu gatnjalat leat šaddan mu borramuš ijatbeivviid.  
Geažos beavvi olbmot dadjet munnje: “Gos lea du Ipmil?”  
Mun golggahan sillon morrašis go muittán dan mii lei,  
go johten stuorra fáru mielde Ipmila vissui  
ávvučuorvasiin ja giitosiin, bassivádjoleddjiid joavkkus.

Manne don muosehuvat, sillon, manne máraidat  
mu siste? Vuordde Ipmila! Dasgo velá oktii mun  
giittán su, Beastán ja Ipmilan.

Sál 42, 2-6

#### Dahje D

Muhto mun bisun álo du luhtte,  
don leat dohppen mu olgeš gieda.

Don láidet mu ráđiinat,  
ja dasto bajidat mu gudnái.

Jos mus leat don almmis, de mun in  
sáva šat maidege eatnama alde.

Jos mu oažži ja váibmu vuoimmehuvvá,  
de Ipmil lea agálaččat mu váimmu bákti ja mu oassi.

Sál 73, 23-26

#### Dahje E

Nugo áhčči árkkálmastá mánáidis,  
nu Hearrá árkkálmastá sin guđet ballet sus.

Dasgo son diehtá mo mii leat sivdniduvvon,  
son muitá ahte mii leat muolda.

Olbmo beavvit leat dego suoidni,  
olmmoš lea dego gietti lieđđi.

Go bieggá šuviha meattá, de dat jávká,  
báiki gos dat lei ii šat dovdda dan.

Muhto Hearrá árvmugasvuohta lea  
agálašvuođas agálašvuhtii sin oassi guđet ballet sus.

Sál 103, 13-17

#### Dahje F

Mun bajidan čalmmiidan váriid guvlui:  
Gos boahtá munnje veahkki?

Mu veahkki boahtá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oađestuva.  
Ii son oađestuva iige nohka,  
son lea Israela goziheaddji.

Herrá lea du goziheaddji,  
Herrá lea du suoivvan du olgeš gieđa bealde.

Beaivváš ii vahágahte du beaivet iige mánnu ihkku.  
Herrá várjala du buot bahás, son várjala du heakka.

Herrá várjala du vuolgima  
ja du boahtima dálážiis gitta agálaš áigái.

Sál 121

## Dahje G

Herrá don suokkardat mu ja dovddat mu.  
čohkkážanba vai čuččožan, de don dieđát dan,  
don árvidat mu jurdagiid guhkin juo.

Váccežanba vai veallážan, de don  
oainnát dan, don dovddat buot mu geainnuid.

Herrá, ovdal go mus lea sátni  
njuokčama alde, de don dieđát dan ollásit.

Maŋábeale ja ovddabealde don birastahtát mu,  
don leat bidjan gieđat mu ala.

Dat lea munnje menddo ovddolaš,  
dat lea ilá allat, mun in árvit dan.

Gosa mun sáhtášin mannat eret du Vuoiŋŋa ovddas?  
Gosa báhtarivččen du muođuid ovddas?

Jos manašin bajás albmái, de don leat doppe,  
jos lážašin vuoiŋŋastansadján jábmiid áibmui, de don leat doppe.

Jos girdilivččen iđitroađi soajáiguin  
ja seivvošin ábi olggumus ravdii,  
de doppege du giehta fáhte mu,  
du olgeš giehta doallá mu gitta.

Jos mun dajašin: “Čihkos seavdnjadas mu  
ja šaddos čuovga mu birra idjan”,  
de seavdnjadas ii leat dutnje seavdnjat,  
idja lea čuovgat dego beaivi ja seavdnjadas lea dego čuovga.

Suokkar mu, Ipmil, ja dovdda mu váimmu,  
geahččal mu ja dovdda mu ráfehii jurdagiid.

Geahča leango mun bahá geainnu alde,



ja láide mu agálašvuoda geainnu mielde.  
24

Sál 139, 1-12.23-

## Dahje H

Juohke áššái lea mearriduvvon áigi,  
ja muhtun áigi lea juohke dahkui almmi vuolde.

Áigi lea riegádit ja  
áigi lea jápmit,  
áigi lea gilvit ja  
áigi bajásgaikut dan, mii lea gilvojuvvon.

Áigi čierut ja  
áigi boagustit,  
áigi biehkut ja  
áigi ilu dihtii njuikkodit.

Áigi ohcat ja  
áigi massit.

Buot lea son dahkan čáppisin dan áigái,  
maiddáí agálašvuoda ge lea son bidjan sin váibmui.

Mun diedán, ahte buot, maid Ipmil dahká,  
dat galgá leat agálaččat; ii dasa leat mihkkege lasiheamošin,  
ja ii das leat mihkkege eretváldámuššan. Sár girji 3, 1-2.4.6a.11a.14a

## Dahje I

Sion celkkii: "Hearrá lea mu guođđán,  
Ja Hearrá lea vajáldahtán mu".

Vajáldahttágo nisson su njammi mánás,  
Nu ahte son ii árkkálmastte su heakkas bártne badjelii?

Jos velá sii vajáldahtežetge, de in mun almmatge vajáldahte du.

Geahča, goappešat giedáidasan lean mun du gova dahkan.

Jes 49, 14-16a

## Dahje J

Hearrá árbmugasvuohta ii noga,  
Su váibmoládisvuohta ii goassege jávkka.

Dat lea ođas juohke iđeda,  
Du oskkáldasvuohta lea stuoris.  
Mun dajan; Hearrá lea mu oassi,  
Dan dihtii bijan doivon sutnje.  
Hearrá lea buorre sidjiide guđet vurdet su  
Ja ohcet su.  
Buorre lea go olmmoš jaskatvuođas  
Vuordá Hearrá veahki.

Vái girji 3, 22-26

## Teakstačoakkáldat II

### Jogo A

Ehpet go dii dieđe ahte mii buohkat geat gásttašuvvuimet Kristus Jesusii gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit odđa eallima, nugo Áhči hearvásvuohta bajásčuoččáldahtii Kristusa jábmiid luhtte. Dasgo jus mii leat ovttahttojuvvon suinna go jápmit nugo son, de mii maiddái ovttahttojuvvot suinna go bajásčuoččáldahttojuvvot nugo son.

Rom 6,3-5

### Dahje B

Jus Ipmil lea min beale, gii dalle lea min vuostái? Son guhte ii seastán Bártnis, muhto attii su min buohkaid ovddas, manne son dalle ii galggaše addit midjiide buot eará go oktan suinna? Gii sáhtá váidalit sin geaid Ipmil lea välljen? Ii oktage, go Ipmil lea dat guhte cealká sin vanhursvánhurskkisin. Gii sáhtá dubmet sin? Ii oktage, go Kristus Jesus lea dat guhte jámii ja velá bajásčuoččáldahttojuvvui ja čohkká Ipmila olgeš gieđa bealde ja rohkadallá min ovddas. Dasgo mun lean vissis das ahte ii jápmin ii ge eallin, eai engelat eai ge eará oaivámuččat, eai dat mat leat dál eai ge dat mat bohtet, dahje miige fámuid, eai dat mat leat badjin eai ge dat mat leat čiekjalasas, sáhte earuhit min Ipmila ráhkisvuođas Kristusis Jesusis, Herrásteamet.

Rom 8,31b-35.38-39

### Dahje C

Dasgo ii oktage mis eale iežas várás, ii ge oktage jáme iežas várás. Jos mii eallit, de eallit Herrá várás, ja jos jápmit, de jápmit Herrá várás. Jogo mii dal eležat dahje jámežat, de mii gullat Herrái. Aiddo dan dihtii Kristus jámii ja eallái fas, vai son sáhtášii leat sihke jábmiid ja elliid Herrá. Muhto don, manne dubmet oskuguoimmát, dahje manne badjelgeahčat oskuguoimmát? Mii han galgat buohkat Ipmila duopmostuolu ovdii, dasgo lea čállojuvvon:

Nu duohta go ealán, cealká Herrá,  
juohke čibbi sodjala mu ovddas,  
ja juohke njuovčča dovddasta Ipmila.

De juohkehaš mis galgá nappo doallat logu Ipmila ovddas.

Rom 14, 7-12

### Dahje D

Ráhkisvuohta ii noga goassege. Muhto profehtastallanattáldagat nohket, gielaiquin sárdnun jávohuvvá, ja diehtu nohká. Dasgo min diehtu lea váilevaš, ja min profehtastallan lea váilevaš. Muhto go ollisvuohta boahtá, de jávká dat mii lea váilevaš. Mánnán mun hálle nugo mánná, mus lei máná miella ja máná jurdagat. Muhto go šadden rávisin, de guđden mánálašvuođa. Dál mii oaidnit dego njoađve

speadjalis, dego árvádusa, muhto dalle oaidnit oktii čalmmiid. Dál lea áddejupmi váilevaš, muhto dalle dat lea ollislaš, nugo Ipmil dovdá mu ollásit. De dat bissot, dát golmmas: Osku, doaivu ja ráhkisvuohta. Muhto buot stuorimus dain lea ráhkisvuohta.

1 Kor 13, 8-13

#### Dahje E

Dasgo dat mii lea nohkavaš, ferte gárvvohuvvot nohkameahttunvuođain, ja dat mii lea jámolaš, ferte gárvvohuvvot jápmemeahttunvuođain. Ja go dat mii lea nohkavaš, lea gárvvohuvvon nohkameahttunvuođain, ja dat mii lea jámolaš, lea gárvvohuvvon jápmemeahttunvuođain, dalle ollašuvvá dat sátni mii lea čállojuvvon: Jápmiin lea njielastuvvon ja vuittojuvvon. Jápmiin, gos lea du seahčagas? Jápmiin gos lea du vuoitu? Jápmima seahčagas lea suddu, ja suttu fápmu lea láhka. Muhto giitu lehkos Ipmilii, gii addá midjiide vuoittu Hearrámet Jesus Kristusa bokte!

1 Kor 15,53-57

#### Dahje F

Muhto bissot čielggusin, mii geat gullat beaivái, ja atnot oskku ja ráhkisvuođa ruovdegárvun ja bestojumi doaivaga oaivesuodjin. Dasgo Ipmil ii leat mearridan min šaddat moari vuollái, muhto vuoittit bestojumi Hearrámet Jesus Kristusa bokte. Son jámii min ovddas vai mii, gozedettiin dahje oadedettiin, ealášeimmet suinna. Dan dihtii, arvosmahttet ja nanosmahttet guhtet guimmiideattet.

1 Tess 5, 8-11a

#### Dahje G

De mun oidnen ođđa almmi ja ođđa eatnama, dasgo ovddit albmi ja ovddit eanan lei nohkan, ii ge mearra lean šat. Ja mu oidnen bassi gávpoga, ođđa Jerusalema, njiedjain almmis, Ipmila luhtte, válmmaštuvvon ja čijahuvvon dego moarsi irggis várás. Ja mun gullen truvnnus alla jiena cealkimin: “Geahča, Ipmila orrunsadji lea olbmuid luhtte. Son orru sin searvvis, ja sii leat su álbmot, ja Ipmil ieš lea sin luhtte. Son sihkku eret juohke gatnjala sin čalmmiin, ii ge jápmiin leat šat, ii ge moraš ii ge bárgun ii ge giksi. Dasgo dat mii lei ovdal, ii lea šat”. Son guhte čohkká truvnnus, celkkii munnje: “Geahča, mun dagan buot ođasin.”

Alm 21, 1-5a

## Teakstačoakkáldat III

### Jogo A

Ávdugasat sii geat leat váivvážat vuoiŋgasteaset,  
dasgo almmiriika lea sin.  
Ávdugasat sii geat leat morrašis,  
dasgo sii ožžot jeddehusa.  
Ávdugasat sii geat leat vuollegaččat  
dasgo sii árbejit eatnama.  
Ávdugasat sii geain lea vanhurskkisvuoda  
nealgi ja goiku, dasgo sii gallehuvvojit.  
Ávdugasat sii geat leat váibmoláddásat, dasgo sii ožžot váibmoládisvuoda. Ávdugasat  
sii geat leat buhttasat váimmus, dasgo sii besset oaidnit Ipmila. Ávdugasat sii geat  
duddjojtit ráfi, dasgo sii gohčoduvvojit Ipmila mánnán. Ávdugasat sii geat  
doarrádallojit vanhurskkisvuoda dihtii, dasgo almmiriika lea sin.

Matt 5, 3-10

### Dahje B

Go sábbát lei vássán ja vahku vuosttaš beaivi čuvvgodišgodii, de Márjá Magdalena ja nubbi Márjá manaiga geahččat hávddi. Fáhkka šattai garra eatnandoarggástus, dasgo Hearrá engel njejai almmis, manai hávddi lusa ja fierahii geađggi eret ja čohkánii dan ala. Son lei šearrat dego álddagas, ja biktasat ledje vielgadat dego muohta. Fávttat doarggistedje balus go oidne su, ja gahčče dego jápmán. Muhto engel sárdnugođii nissoniidda: “Alli bala! Mun dieđán ahte doai ohcabeahtti Jesusa, gii rusiinávlejuvvui. Son ii leat dás, son lea bajásčuoččaldahttojuvvon, nugo celkkii. Boahtti geahččat báikki gos son veallái! Doapmaleahkki su máhttájeddjiid lusa ja daddji ahte son lea bajásčuožžilan jábmiid luhtte ja manná Galileai din ovdalis; doppe dii oaidnibehtet su. – Dál lean cealkán dan dudnuide.”

Soai doapmaleigga eret hávddi luhtte balus ja stuora ilus, ja viehkaleigga muitalit dan su máhttájeddjiide. Dalle Jesus bođii sudno ovddal ja dearvvahii sudno. Soai manaiga ja fátmasteigga su julggiid ja gopmirdeigga su. Jesus celkkii sudnuide: “Alli bala! Manni muitalit mu vieljaide ahte sii galget mannat Galileai. Doppe sii oidnet mu.”

Matt 28, 1-10

### Dahje C

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: “Diktet uhca mánážiid boahtit mu lusa, allet ge hehtte sin”. Dasgo Ipmila riika gullá dakkáraččaide. Duodaidd, mun cealkán didjiide: “Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válddii sin sallas, bijai gieđaidis sin ala ja buressivdnidii sin.

Mark 10, 13-16

## Dahje D

Bidjet boahkána ja doalahehket lámppáineattet čuovgga.

Lehket nugo bálvaleaddjit geat vurdet isideaset ruoktot heajain, vai sii sáhtášedje rahpat sutnje uvssa dakkaviđe go son bohtá ja goalkkuha. Ávdugasat dat bálvaleaddjit geaid isit gávdná gohcimin go bohtá! Duođaid mun cealkkán didjiide: Son bidjá boahkána, gohčču sin beavdá ja bálvala sin ieš. Jos son vel bođeš ge easka nuppe dahje goalmmát idjagohcinvuorus ja gávdná sin gárvvisin, de ávdugasat dat bálvaleaddjit.

Luk 12, 35-38

## Dahje E

Jesus cealká:

Duođaid, duođaid, mun cealkkán didjiide: Dat guhte gullá mu sáni ja osku sutnje gii lea vuolggahan mu, sus lea agálaš eallin; son ii boađe dupmui, muhto lea juo mannan jápmimis eallimii. Duođaid, duođaid, mun cealkkán didjiide: Bohtá áigi, ja dat lea dál juo, go jábmit gullet Ipmila Bárti jiena, ja sii geat gullet, ožžot eallit. Dasto nugo Áhčis lea iešalddis eallin, de son lea maiddái suovvan Bárdnái ge ahte sus lea iešalddes eallin. Áhčči lea addán sutnje dubmenválldi, danne go son lea Olbmobárdni.

Joh 5, 24-27

## Dahje F

Buohkat geaid Áhčči addá munnje, bohtet mu lusa, ja dat gii bohtá mu lusa, su in eisege áje eret. Dasgo mun in leat bohtán vuoláš almmis dahkat dan maid ieš dáhtun, muhto su dáhtu, gii lea vuolggahan mu. Ja dát lea mu vuolgaheaddji dáhttu, ahte mun in masse ovttage sis geaid son lea addán munnje, muhto bajásčuoččáldahtán sin mañimuš beaivvi. Dasgo dát lea Áhččán dáhttu, ahte juohkehaš guhte oaidná Bárti ja osku sutnje, oažžu agálaš eallima, ja mun bajásčuoččáldahtán su mañimuš beaivvi.”

Joh 6, 37-40

## Dahje G

Mun lean buorre báimman. Mun dovddan sávzzaidan, ja mu sávzzat dovdet mu. Ja mun attán daidda agálaš eallima; dat eai láhppo agálašvuodas ge, ii ge oktage gaikkit daid eret mu gieđas. Áhččán, guhte lea addán daid munnje, lea stuorit go buohkat, ii ge oktage sáhte gaikkihit eret ovttage Áhččán gieđas.

Joh 10,14.28-29

## Dahje H

Alloset din váimmut suorganehko. Oskot Ipmilii ja oskot munnje! Mu Áhččán viesus leat ollu lanjat. Jos nu ii livčče, de mun cealkkášin didjiide dan. Dasgo mun manan gárvvistit didjiide saji. Ja go mun lean mannan ja lean gárvvistan didjiide saji, de boadán fas ja válldán din lusan, vai dii livččiidet doppe gos mun lean. Ja dii diehtibehtet geainnu dohko gosa mun manan. Duomás dadjá sutnje: “Hearrá, eat mii

dieđe gosa don manat. Mo mii de sáhttit diehtit geainnu?” Jesus cealká: “Mun lean geaidnu, duohtavuohhta ja eallin. Ii oktage beasa Áhči lusa earet mu bokte.”

Joh 14, 1-6

\*

Mánáid hávdádeamis adnojuvvojit omd. dát lohkosat, ná álggahettiin:

**L** Gullot mo Jesus rabasta Ipmila riikka mánáide.

Čuovvovaš golbma teavstta lohkkojit maŋŋálaga:

Sii gudde uhca mánáziid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: “Diktet uhca mánáziid boahit mu lusa, allet ge hehte sin”. Dasgo Ipmila riika gullá dakkáraččaide. Duođaid, mun cealkkán didjiide: “Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válddii sin sallas, bijai gieđaidis sin ala ja buressivdnidii sin.

Mark 10, 13-16

Jesus cealká:

Mun lean buorre báimman. Mun dovddan sávzzaidan, ja mu sávzzat dovdet mu. Ja mun attán daidda agálaš eallima; dat eai láhppo agálašvuodas ge, ii ge oktage gaikkid daid eret mu gieđas. Áhččán, guhte lea addán daid munnje, lea stuorit go buohkat, ii ge oktage sáhte gaikkid eret ovttage Áhččán gieđas.

Joh 10,14.28-29

Herrá apoasttal cealká:

De mun oidnen ođđa almmi ja ođđa eatnama, dasgo ovddit albmi ja ovddit eanan lei nohkan, ii ge mearra lean šat. Ja mun oidnen bassi gávpoga, ođđa Jerusalema, njiedjamin almmis, Ipmila luhtte, válmmaštuvvon ja čijahuvvon dego moarsi irggis várás. Ja mun gullen truvnnus alla jiena cealkimin: “Geahča, Ipmila orrunsdaji lea olbmuid luhtte. Son orru sin searvvis, ja sii leat su álbmot, ja Ipmil ieš lea sin luhtte. Son sihkku eret juohke gatnjala sin čalmmiin, ii ge jápmin leat šat, ii ge moraš ii ge bárgun ii ge giksi. Dasgo dat mii lei ovdal, ii lea šat”. Son guhte čohkká truvnnus, celkkii munnje: “Geahča, mun dagan buot ođasin.”

Alm 21, 1-5a

Njuoratmánáid dahje mánáid hávdádeamis geat leat jápmán ovdal riegádeami, sáhtta válljet eará teavsttaid go daid mat bajábealde leat namuhuvvon; omd. 39. sálmma, 5-8 dahje 139. sálmma, 1-6.3-18. dahje teavsttaid mat sierraládje ovdanbuktet gillámuša, bákčasa ja dan maid ii sáhte ipmirdit.

Ortnega eará ladđasat adnojit nugo rávis olbmuid hávdádeamis ge.